

**Tant ti manjou...**  
Thérèse Puel  
(enregistrée le 19 mai 2010)

En còu, sabès bè, amou à Nòutès, staion... Durmion damou. Lis omes faion la navèto, calavon lou lach à la vilo pisqu'i èro la couperativo, e la gran-maire, elo, staidò souleto, aiò en pichin aberc damou.

E cada sero s'assetavo aqui al fioc e si metiò doui poums à couiré.

Aiò de galinos, de lapins, anavo vendre la siou marchandiso daval à Bertemou, sai, e de sero si recampavo, faiò la siou soupo tranquilo mai si doui poums à fioc.

Ma i èro de pelandrouns que si dihon :

- Aquelo vièio dèu aver de sòus, calo cado jou... Dèu aver en pichin mago.

Alouro soun vengus tout-ai-dous.

Quouro soun agu aqui à la pouorto, n'i a un, i a scapa cagar, e l'autre èro qui à la pouorto qu'escoutavo.

Alouro la vièio s'es messo à charar, ma charavo ai poums, perque li poums, sabès, si duèrbon, li dihò :

- Tant ti manjou, tu que cagues e tu que cagues rè !

L'autre l'a senti.

- Co es ena masco, a dich : « tant ti manjou, tu que cagues coumo tu que cagues rè ! »

Es ensi qu'a sòuva la siou vido. En charant ai poums, a agu la vido sòuvau.